

泉州府志卷之六十一

樂善

泉土瘠民貧一二素封之家類皆口約腹裁自營什一之利外此或經商於吳粵或泛航於外國其致之匪易則其出之也不輕於是計錙銖析秋毫有甘受鄙吝之誚而不辭者惟夫好施者流見善如饑赴義如渴凡郡邑大役以及橋路寺觀恆傾囊倒困以濟其他憐貧周急恤孤助喪皆出於中心之樂從而無所強彼固謂天地生財勢難適均酌盈劑虛不必視爲已有也若乃家無百畝產僅中人遇有義舉猶竭力捐貲以應之室內常空晏如也

國家下旌勸之典凡慕義好施者授爲職官榮以冠帶自督撫大吏以及郡邑長亦時賜額以褒之視夫擁厚貲利子孫卒之泯泯無聞與草木同腐者竟何如耶志樂善

唐樂善

黃守恭先光州固始人移居泉州樂善好施人稱長者垂拱閒夢一僧乞所居地爲寺唯之口樹產白蓮乃可越

二日桑樹果開蓮花遂捨宅以建卽今之開元寺僧人爲立祠禪堂之左世祀之子四經紀綱綸分居南惠溪同四邑後皆蕃衍稱爲四安黃氏

宋樂善

陳彥達

李密 李國表

謝應瑞

劉君輔

陳彥達晉江人家富篤義時出私財助公見人貧乏惠濟之讀書手不輟卷舍南數武爲別館中堂設圓牀環榻與朋友共食士無資者就彥達昕昏食飲寒暑裘葛油

泉州府志

卷之六十一

宋樂善

二

膏紙筆之費皆無所吝鄭俠名其齋曰尚友而爲之記

閩書

李密李國表俱晉江人向義樂施郡南六里陂下溉七十二埭居晉邑田賦三之一自五代時吳公創設四陡門內蓄溪流外拒海潮至靖康元年崩壞密與國表請於邑令洪元英卽命二人董其事乃自捐千金與僧祖派體柔于紹興六年定基築造加設二閒遂稱六陡門歷三年告成又慮歲久復壞會四十三鄉請郡縣設陂夫官給工食於上高下瀉之處立數涵定期啓閉木印封

固以垂永久明僉事李墀作增築六陡門記尙寶卿李

源勒諸石

節碑文

謝應瑞晉江人淳祐六年郡飢自出私錢四十餘萬糴米

賑人詔補進義校尉

閩書

劉君輔字仲佐號西橋晉江人生淳祐閒仕宋主簿幼失

怙及長竭力經營置田南同二邑計三十六庄租八萬

四千石外復有山林地稅於祥芝本里構孔聖廟像爰

構書塾於芝山延邱葵林興祖諸名宿教子姓歲出粟

三百石爲師徒俸膳之費興建慈濟宮金沙接待院海

泉州府志

卷之六十一

宋樂善

三

會堂古山庵龜湖東庵青蓮院豐山巖塘邊巖重修虎

岫寺其餘庵廟壇榭脩葺者莫能枚舉年七十一卒

元樂善

趙深道

劉益

趙深道晉江人樂善好施至正甲午歲歉飢殍載道深道

於中和堂設粥令飢者列坐供之所活甚衆旣而大疫

死者相枕藉深道造舟施輪其下會衆僧以長繩挽拽

沿街搜索或遇門閉輒排以入舟挽各城門外埋瘞之

日不下數次有司以聞于朝旌表其門曰義士

舊志

劉益字有諒晉江人由良家子弟師義兵從帥府討山寇
呂甫以軍功補官至正中授晉江縣尉以運饋餉至大
都陞南昌主簿西域那兀納等據泉炮烙州民以索貨
財不得者多置於死益悉捐家貲贖之所活者甚衆咸
聚於西峯院飯僧爲益祈福後謝事家居無病而逝年
八十四 八閩通志

明樂善一

徐廻遜

李英

陳乾道

李明

泉州府志

卷之六十一

明樂善

四

張頤

胡欽

李森

李却若

歐陽鎬

李杲

胡乾篤

蕭銘

李珏

陳樸軒

莊鐸

潘泗

林興

蔡德

徐用賓

鄭承元

陳庚

詹仰憲

涂紹淵

王汝雲

王叔中

李梯

吳良獻

林健

徐廻遜字世淵晉江人薦辟福祖子慷慨有大節能拔人難危中小弱輩藉以爲活者常數十百家先是光孝寺災獨力重建無所吝嗇又以清淨寺淺逼更拓地架堂廣之今紀德遺碑猶有存者年八十餘卒御史林潮爲立傳紀之子陟永樂庚子舉人

李英字俊育晉江鳳池里人以貲豪里中而急爲義人目

泉州府志

卷之六十一

明樂善

五

爲長者縣洛陽橋歲久海沙日積橋址下沒而風潮過當水嘗漫橋不得涉守馮禎以委英英出貲高之幾六尺凡費貲萬計郡南洋田界于海捐貲築堤堰時啓閉自是旱潦無虞今其子孫多衣冠而鳳池之李爲華族

閩書參水

利功德錄

陳乾道

同安志作乾通

同安人唐陳塲老之後家富好善至老康

寧子姓滿前年九十五終曾孫華玖宏治戊午舉人

閩書

參同

安志

李明晉江竹樹人正統閒開客舍生理有永春吏解糧投

宿因醉置銀數錠計五十餘兩於床蓐下次早行急忘取去明檢得封識之月餘其人復來寓問其近况蹙然曰前月來郡因醉遺銀至今揭賠未完明立取原銀還之吏驚喜願以半謝固却之後生子源登進士官尙寶卿明生封主事享福二十餘年

近時新案

張頤字士表惠安人恤孤賑貧作家塾延名儒教子孫親戚子弟來學者悉廩之歲大疫鄉人或闔門病頤持粉漿藥物沿戶省視正統中沙尤寇發距縣四十里衆惶惑欲避頤力言縣尹當扼要堅守毋自恇擾俄有令抽

泉州府志

卷之六十一

明樂善

六

大戶轉米餉軍人沟洫謀避頤率先詣縣受米尹大喜卽委頤督餉頤勒什伍止宿輸納悉有次第暨畢事無一亂行者

閩書

胡欽安溪人仗義好俠能以其貲爲善事天順戊寅歲大飢出粟千石助賑事聞褒異賜冠帶有司建亭旌之得蔡清於齠稚時以女妻之後果以理學爲一代名儒人

服其知人之鑒

節王遵巖文集

李森字俊茂號樸菴安溪感化里人天順中任源口司巡檢少慷慨有志尙席先貲益盡力居積乃計歲入捐粟

千斛別窖之凡親戚里中人嫁娶病葬緩急咸賑贍之
郡太守欲脩治堂筦庫森慨然任之又佐脩郡學邑治
堂過劍口渡患人病涉召匠爲造二十梁工未就有老
人語曰盍塔諸言已不見森塔之復橋莆田江口脩郡
東嶽廟及元妙觀創五帝殿寢復爲本邑建龍津鳳池
等二十五橋龍津清溪獅子等宮宇尤所助脩福州芝
山寺前後費不貲而李長者之名著于閩中天順中應
詔出粟五千石賑濟又募義輸邊粟三千石朝旨旌爲
尙義錫文綺二森詣闕進方物稱謝命宴勞之時鄉落

泉州府志

卷之六十一

明樂善

七

盜發森悉擒殺之沙尤寇掠泉森掩擊生俘酋黨餘皆
就撫上其功授漳州九龍嶺巡檢頃之從安溪民請調
源口永春德化前後缺令監司委森攝篆多惠績又攝
本邑事復脩公署建儀門百廢具舉胞弟却柰咸駢爲
義別有傳李氏子孫稱森曰旌義公森平生嗜義好施
五十年閒建造經營蓋無曠時虛歲云

國朝康熙閒裔孫光地以森賑飢平賊事奏聞

欽賜急公尙義匾額

舊志參閻書
安溪志

李却柰字俊德安溪人森之弟以曲謹聞有故人急欲貸

其兄森五百金不能應長吁輟食却帑偵知爲具如數
勸加餐與其兄俱稱長者

節安
溪志

歐陽鎬南安人幼喪父旣而祖父與伯叔耆功之親相繼
淪沒鎬孑然隻身依祖母爲命天資聰敏仁厚弱冠能
奮然自樹立孝養祖母撫卹族人敦睦親戚人皆賢之
治貲漸裕先世門閥悉還舊觀值邊事急出粟助邊得
邀冠帶之賜

節蔡文
莊集

李杲號愛松晉江人郡南六里陂瀦水灌田堤決水瀉農
民倉皇邑簿驅役築之累月而工弗集值東作方興民

泉州府志

卷之六十一

明樂善

八

心益急以請于杲遂捐資毅然脩之不日竣功鄉民賴
之子貫宏治壬戌進士兵科給事中

節水利
功德錄

胡乾篤

閩書作
乾爲

同安人父克裕有孝德偕妻雙壽至九十

一歲乾篤事親孝謹好善行義成化辛丑遇例納粟給
冠帶造余塘溪橋以利行人旣訖工請父母行橋上效
舞綵戲鄉人羨之著家訓以示子孫於赤泥山立義塚
收埋枯骨邑令龍越作忠義堂旌之子廷銘亦有孝行
曾孫明佐萬歷壬午舉人壬辰進士累官山東叅政

閩書

叅同
安志

蕭銘字克純號雪松晉江人敏慧有心計與時伸縮居積致富所酬酢多合宜課僕力穡以爲儲蓄遠出徒行衣服非垢敝不易自奉泊如也事父母竭致脩髓得其歡心處兄弟友愛親歿喪葬事獨任之弗累諸弟建祠宇置祭田遇匱乏者周之橋梁圯壞者脩之丙申丁酉歲大飢發粟賑之郡太守深褒嘉焉晚於後園築軒鑿池培植花卉招知友爲逸樂會年六十八卒司徒顧珣銘其墓

節顧新山文集

李珏號素軒晉江人祖璫正統間董脩六里陂有功歷宏

泉州府志

卷之六十一

明樂善

九

治辛酉陂壞珏倡首捐資相度地宜變舊基而改築之視前加固衆復推珏掌陂事乃命季子宗綸任其役時苦盜洩珏令當適南之橋重築一垠七分提壅以爲六里之利三分中流以爲下溝之資上下交濟內外適均而舟楫亦不至於阻隔人皆便之

節水利功德碑

陳樸軒同安人爲經歷書記成化初大小登民以通夷內徙委經歷查勘朴軒爲極陳登民化離狀且代畫保全之策經歷如指抗言之得全活者數千人建祠勒石頌其德元孫基虞

同安志

莊鐸字世鳴號儼齋惠安人警慧特達善養親親歿殯於
葬祭身獨任之處兄弟怡怡出入衣冠整然與人交洞
見底裏有告乏者輒周之捐百金以建忠義神祠宏治
己未歲大祲郡太守檄舉糴粟于廣以賑飢鐸往返再
四民賴以全活者甚衆年八十九卒司徒顧珣爲銘其

墓節顧新
山文集

潘泗字德政晉江人賈於三山主鄭家與徽賈同舍徽賈
遺橐金去泗將他徙得之乃攜往別寓而時時之鄭家
徘徊者四十餘日後一日之鄭聞戶內勃磳聲疑問其

泉州府志

卷之六十一

明樂善

十

故具言客遺篋金疑吾妻利以嫁女索急女無以自白
欲就死泗大驚曰誤矣吾遲久不去正爲此也立往他
舍舉橐還之賈感泣曰吾生平拮据盡此二百餘金金
去命隨之矣非君活我幾索我于南臺江之滸願割半
以謝辭不受羣賈義之稱曰真叟子實寬

集

舊志參閥書
景璧

林興字廷讓號逸齋安溪駟嶺人入粟助官旌爲義民嘗
言逸最有趣世鮮有得之者潘居正悅松泉之須陸魯
望任江湖之散亦若得之矣而未見其深也在人境無

車馬之喧見南山有悠然之適斯深於逸矣人聞而訝之曰義民僅知急公取冠帶榮於鄉耳安能言及此此豈尋常義民耶由是皆稱為逸齋公有語以求田間舍者輒艷然曰我真田舍翁耶既呼我為逸齋如何又來薰我以俗耶女妻於詹早寡遺孤源興多方撫恤俾得力學有成女以貞節見旌年七十二卒陳琛為銘其墓

節陳紫
岷文集

蔡德字永興號易齋晉江安平人有弟三人俱早喪鞠其遺孤長為婚娶待宗黨有恩鄉有朱子祠官重新之擇

泉州府志

卷之六十一

明樂善

士

德董其事殫力經營食寢俱廢東西二石橋跨海數里歲久傾圯德捐貲倡新行人利賴歲飢官給直買穀散賑推德任之貧戶均沾沒後史于光為銘其墓

節荀
江集

徐用賓字子尚號少涪晉江人南京戶部主事榮之子弱冠補弟子員有聲應貲例授典客出為攸縣簿兩督祭上留曹於例羨一無所染長沙守賢之委署邑篆用賓懇辭曰行者代庖居者移擔恐忌端從茲啓耳守心服其言復督運又無所染如初廉聲四起上官咸稱其賢遷丞無錫無錫頗患歲惡革轉者剽奪奪相屬於途用

賓嚴訊捕日設粥賑飢掩骼給槥皆捐俸濟之民呼曰
徐父壽卒于官用賓內行淳篤天性惻怛友人有告匱
者倒囊糈券無所吝嘉靖丙申丁酉大荒疫用賓夜衣
短衣偕一蒼頭負銅錢十餘肩施之不令知姓名日則
搜屍埋葬凡六十晝夜甲辰乙巳旱疫益甚時用賓家
已落假貨賑捨如故辛酉壬戌倭寇充斥官私俱困賣
田宅以應公役而恤飢孱仁枯骨如初計其三度施賑
費不下數千人比之東漢劉翊孫繒芳萬歷辛丑進士

舊志參閱
書

泉州府志

卷之六十一

明樂善

七

鄭承元字仁甫號梅峯晉江人潮州守良佐季子為郡諸
生有聲父歿毀瘠三年既除服擬游上舍會母病不果
貲漸落乃剖橐中藏出金錢數千緡遴二三蒼頭留遷
旁郡漸致豐裕復躬走吳越趨時觀變所至與賢士大
夫傾蓋相驩百金為壽名山大川登臨殆遍歸構亭一
區脩竹數椽左圖右史嘯咏其中亭外鑿池畜魚延賓
客開樽舉網浩歌自得為人樸誠惇厚事親孝與人信
父兄子姪多顯偃僂益恭性厭紛華食無重肉衣無襲
綵行不張蓋施德于鄉兵燹之歲殍氓載途發圉煮粥

全活無算予不任德貧不責償焚券市義分散貧人厚施而薄望蓋以儒治賈致富而好行其德者

節景璧集

陳庚號介山晉江人剛方朴直言行信於鄉事親孝及父歿撫愛幼弟尤篤家頗饒而服御澹如至大義所關則不計費嘗營父葬地度平行可多壙分其半以葬從叔父有姻戚柯與馬姓老而寡爲買櫬以待其終親屬與居室緇道葺寺宇每捐粟數十斛助之性喜飲酒每往必與弟偕弟或不往則不醉而歸見子能讀書者厚鍾愛之卒後丁自申爲之銘

節三陵稿

泉州府志

卷之六十一

明樂善

三

詹仰憲原名仰成字爾憲以字行補邑弟子員曰仰憲安溪人仰庇弟敏智算善壁畫輕財喜費而恥自封郡邑大夫有興作之事輒求仰憲主治仰憲於凡木植輓輓漆髹塗墁踊賤厥良心計目審不失尺寸工匠執技以從如部曲之隸將帥手足併赴不督自趨官役仰公帑或不時給仰憲出橐中裝先之畚鍤小人尤樂從事所作治具可堅久而家貲爲損減郡邑大夫善仰憲佐公家急親禮過當仰憲又交游諸公懽洽無閒時時解紛持平於親友閒所以賑飢濟貧惟力是視甞子飢人天

且父之仰憲所爲郡邑治工作不可勝數其大者在新
文廟繕泉城脩洛陽橋作嶽神廟塔溜石之灣以綰泉城
風氣於清溪本邑捐貲構名宦鄉賢二祠少孤事兄仰
庇若嚴父兄貴不屑以勢醖加人謙恭下士不輕干謁
有司歲飢殍死相望有司開倉發帑請主其事仰憲以
身自往城市村落閒隨處散給益以已貲煮粥與飢者
食或分以錢人賴全活平日任事無首鼠無避勞辭怨
衆危之不爲動人誹之不爲沮游閒里閒與人有所掖
護歸自喜曰今日幸行一善事矣夜立中庭禱告帝鑒

泉州府志

卷之六十一

明樂善

古

以爲常李廷機常稱其天才人傑云仰憲死他日郡城
崩學舍圯橋梁頽泉人歎曰無詹公矣祀忠義

景璧集
參安溪

志

涂紹號慄齋晉江人好義勇爲筍江橋圯捐資率衆脩之
歲飢道多餓瘠官勸分聚米煮粥救活紹出米獨多受
獎勵值公務經費不足邑令懸格募出錢計多少予散
官有差紹出錢獨多得七品散官賜冠帶戎籍有涂伯
堅者戶已絕名猶繫籍中仇人指証紹族曰此伯堅之
涂當勾丁應籍以從伍族人咋舌彈指莫知所爲紹出

鳴于官淹三載乃決費至數百金未嘗銖髮及族人
義舉多類此子淵能詩爲梁家沙巡檢再除神安鎮巡
檢譏禦之外不索一錢里人王慎中爲文誌其父子

王節

遵嚴
文集

王汝雲晉江沙堤人守約好施尙義強幹嘉靖丁亥閒大
雨連綿溪漲海溢留公陂之左堤決田沒民苦賠賦因
循六七載適太守屠倬拯念民瘼捐俸議伐松驅石築
之而難於董事衆咸謂非汝雲不爲功遂以禮致之汝
雲至則矢於衆曰敢千秋毫怠事方命官有常刑於是

泉州府志

卷之六十一

明樂善

五

協力羣作供役傳餐於家不廢公餽未終歲而石堤成
太守躬詣宴勞簪花鼓樂導歸越丙申舊陂復比太守
王仕俊詢于衆復以幣請汝雲續功益力不數月竣事
由是水循故道田耕而賦復晉惠兩邑世受其利後僉
舉爲鄉賓司徒顧珣爲文記之勒石陂左

採顧新
山文集

王叔中字道成晉江人武肅王審邽之後天性孝友樂善
好施郡東岳祠旁有地祇院邑令以淫祠欲毀之叔中
捐貲謀衆易廟額曰忠義亟塑陸秀夫文天祥張世傑
岳飛張巡許遠關天于蘇緘趙昂發諸忠烈神像由近

遡古事急未暇論世像既成令鮑龍過之展拜焉院得以不毀又以舊宇就圯圖鼎建而貲不給夢神告曰予助爾掘土廟前得銅鉢金銀用怡足後以予貴封戶部員外舉鄉飲大賓年七十六卒郡人義之爲構堂像祠于廟左子同讚嘉靖戊午舉人壬戌進士歷官知府

書
鈔

李梯字冠夫號龍溪晉江人移居南安幼喪父事母恪恭嘉靖丙午有流寇剽里母被傷梯適在郡城痛且憤捐貲募鬪士扼賊衝擒數十人歸于官而致之辟歲飢出

泉州府志

卷之六十一

明樂善

夫

粟百餘石輸官條事宜行之藉以全活者甚衆邑令行均賦法屬爲耆正履畝考則咸服其平祖祠淺狹捐分地並易地拓建之有族姪貧不能舉婚給田十餘畝助聘娶嘗曰天道忌完神道忌彰人道忌露物道忌華君子蓄之以爲發守之以爲通明也而晦居之才也而拙用之裕也而約出之天神人物之道所由貞也人謂其言有味焉

吳良獻號北瀛嘉靖閒晉江人博學潔行教授生徒遇貧乏輒分賴閒哺教且養之晚粵東督師迎爲幕府值討

賊脅從者槩議戮良獻勸令審釋不許輒廢食全活至百數十人回家道漳州見有攜幼女投水者急問其故則因逋官錢莫償也傾囊與之抵家無以度歲晏然自得年六十四歲始生子載鰲登進士官僉事近時新案林健晉江人家貧尚義歲飢爲粥以食餓者族有病疫人爭避之健叩門聞呻吟聲詢其家不舉火二日矣亟措斗米濟之嘉靖閒倭亂有族宦避兵城壘金帛籍券數千百盡委健爲周旋十餘年事定給還無失欲有分界却不受嘗以堪輿遊漳三載值歲暮歸道遇貧嫗將鬻

泉州府志

卷之六十一

明樂善

七

女持而哭詢狀傾懷中金十五兩盡與之至家索債者盈門妻情急伺健出闔戶投繯忽聞空中大呼曰且放他下俾生貴子貴孫其繯忽斷是年遂生子武且後貴贈如其官孫欲棟欲楫近時新案明樂善二

胡道

陳衢

吳輝

林彥佳

李炳

蘇玉

顧應蘭

何元選